



Co guarda ora la pli nova story dal Festivalet sin Instagram? Corsin Derungs, Olivia Spinatsch, Gion Fry e Benedetto Vigne èn ina part dal comité d'organisaziun dal Festivalet ed han era durant gientar da discutir e schliar problemis.

FOTO OLIVIA PORTMANN-MOSCA

«Il Festivalet è ina gronda chista»

Ils 20 e 21 da zercladur 2025 ha lieu l'emprim Festivalet rumantsch, era per betg Rumantschas e Rumantschs, a Turitg. Il program è cler, i mancan dentant anc in pèr milli francs, ed ils organisaturs fissan cuntents, sch'i pudessan vender anc intgins tschient bigliets ordavant.

OLIVIA PORTMANN-MOSCA/FMR

Las agendas èn plainas – il comité d'organisaziun propona perquai in termin sur mezdi. Uschia èn Corsin Derungs, Benedetto Vigne, Olivia Spinatsch e Gion Fry, ina part dal comité, vegnids gist suenter lur seduta per colliar il duair, il discurs culla schurnalista, cun il necessari, il genter. In pled suonda a l'auter e gia è il comité puspè en ina discussiun sur dad ulteriurs «to do's» ed ideas co ch'ins pudess schliar anc in problem. «Gea, il Festivalet è ina gronda chista», conceda Olivia Spinatsch che lavura en il secretariat dal Festivalet. «Ma nus essan da bun anim e persvas ch'i vegnia a dar ina buna chausa.»

«Tut en tut ans avain nus dentant organisads bain, cun schefs da ressorts e substituents per mintga post», declera Gion Fry, il schef da comunicaziun. I dettia anc blera lavur da far, ma els lavurian bain ensemen e sa tegnian vi da lur glistas cun ils «to do's», renda attent Benedetto Vigne, il director da l'entira occurrenza. Ma ussa saja in temp intensiv, cun bleras discussiuns e da la gronda speranza da betg emblidar insatge impurtant.

In entir edifizis dad events ed ina baselgia

Las localitads èn reservadas, il lieu dad events X-tra a Turitg e supplementarmain era la Johanneskirche gist daspera. Il X-tra ha pliras stanzas che ston era vegnir emplenidas. «Ch'ìls cors dattan lur concerts en la Johanneskirche, quai era cler da l'entschatta davent», declera Corsin Derungs, co-iniziant e responsabel per la gastronomia dal festival. Cun chaminar tras las localitads hajan els survegnì las ideas co reparter ils differents puncts da program, raquintan ils organisaturs. «Per exempel avain nus vis cun entrar en il foyer dal X-tra ch'i dat in pèr stgalims cun in palantschieu e pensà che quai è il lieu ideal per il cor Incantanti per lur concert d'avertura dal Festivalet», declera Benedetto Vigne, responsabel per ils artists. Sper las decisiuns tgenin punct da program che capita nua, dettia anc blier auter che stoppia ve-

gnir resguardà sco la tecnica, la purschida culinaria – tipic rumantscha – e natiralmain ils giavischs spezial da las artistas ed ils artists.

250 artistas ed artists

En dus dis survegnan tut en tut 25 acts (dapli dal program guarda boxa) la pussaivladad da sa preschentar. «Cun tut las commembras ed ils commembers dals cors èn quai radund 250 persunas», di Benedetto Vigne. El è cuntent cun il resun: «Las artistas ed ils artists èn tuts fieu e flomma per il Festivalet e s'allegran zunt per questa fin d'emna.» Cler ch'in ni l'auter haja anc giavischs spezial, conceda il responsabel per ils artists. Tschertas chaussas possia el schon accumplir e tschertas chaussas, sco per exempel auters temps per il soundcheck, na sajan betg pussaivlas. «Cun tants acts è quai in vaira «tetrisc» dad arranschar tut, per ch'il program gaja si.»

Dasper ils concerts, prelecziuns, poetry slam ed il program da famiglia ha il comité dal Festivalet era surprindì l'organisaziun da l'emprima radunanza da delegadas e delegads da la Lia Rumantscha ordaifer la regiun da tschep.

Campagna da social media e placats al HB

Per tut las piculezzas che ston anc vegnir organisadas sajan els era trasora en contact, declera il comité d'organisaziun. Quai che saja uss anc, stgars in mais avant l'eveniment, da far cun gronda paisa, saja la reclama, ils discurs cun la pressa e la campagna sin social media, raquintan Benedetto Vigne e Gion Fry. Mintgin fetschia ses pussaivel: Entant che Corsin Derungs è preschent en ina emissiun speziala cun musica rumantscha tar l'emettur Musikwelle e scriva directamain a las vischnancas grischunas per sustegn, discorra Benedetto Vigne cun la pressa turitgaisa e Gion Fry ed Olivia Spinatsch sa concentreschan sin la campagna online e sin ils placats. In da quels vegni perfin a dar a la staziun principala da Turitg. Ma tutas e tuts èn era fitg activs cun sparpagliar fegls volants. «Ussa, curt avant il Festivalet dovri anc in augment da nossa reclama e da la visibilitad», constatescha Gion Fry. Ch'els hajan planisà in'en-

tira campagna en las medias socialas, raquinta sin quai Olivia Spinatsch. «Nus preschentan noss acts, avain però fatg er pitschens filmis cun passants turitgais e natiralmain datti da vesair curtas istorgias da davos las culissas sin Instagram.» I rendia en mintga cas da seguir il chanal, di Olivia Spinatsch cun ina tschegnada. Gia be pervia da las differentas collavuraziuns cun partenaris che fetschian alura era anc in'acziun da bigliets.

I mancan anc radund 40000 francs

Il Festivalet haja in budget da radund in quart milliun francs, tradeschan ils organisaturs. I manchian dentant anc var 40000 francs. «Quai n'è insumma betg per vegnir ritg, mabain mintga franc è gia sparpaglià», renda Gion Fry attent. Els hajan tschertas expensas che sajan magari evidentas, sco ils custs dals placats ed dals volants. Dentant dependian tscherts custs era da quanta glieud che vegnia la fin finala. E per avair ina tscherta segirezza fissi flot, sch'i pudessan vender almain 600 bigliets ordavant. Per il mument na saja quella finamira anc betg cuntanschida. «Nus savain dad autras occurrenzas che la glieud sa decida magari spontanamain ozendi», raquinta Corsin Derungs che ha experientscha cun organisar concerts en il num da la l'uniun Cultura Rumantscha en la Bassa. «Gia pliras giadas n'avevan nus betg vendi blier ordavant e la fin finala – per exempel sco durant l'ultim concert si Faveras – era la baselgia dal tuttafatg plaina.»

Il public en mira saja fitg multifar e quai na fetschia betg uschè simpel da chattar il gist chanal per far reclama, declera Gion Fry. «Nus avain in program fitg diversifitg: da rock e pop fin tar chant da cors, cultura, prelecziuns e perfin in program per uffants», explitga Benedetto Vigne. «Cler che la gronda part è per rumantsch, dentant avain nus era pensà a tschertas translaziuns, uschia che glieud betg rumantscha chapescha era.» E dal rest sajan tutas e tuts bain vegnids che han ina simpatia per il rumantsch. Bigliets datti per venderdi u sonda ubain era gist per l'entira fin d'emna.

GRISCHUN

Uffizi da furmaziun professiunala schlargia servetschs online

L'Uffizi chantunal per la furmaziun professiunala schlargia ses servetschs electronics sin sia plattafurma online www.afb.gr.ch, sco ch'el scriva en ina comunicaziun a las medias. Da nov vegn vitiers la registraziun digitala per dus servetschs:

- Persunas en scolaziun cun in impediment pon s'annunziar per la cumpensaziun dals dischavantatgs.
- Persunas che vulan prender suenter la scolaziun da basa per ina professiun pon s'annunziar digitalmain.

Era pon tut ils documents necessaris vegnir chargiads sin la plattafurma. Quai auzia la segirezza e simplifitgeschia la comunicaziun da decisiuns, scriva l'uffizi. (cdm/rtr/fmr)

REGA

Sgulà 180 giadas sur la fin d'emna prolungada

La guardia aviatica svizra Rega è stada dumandada durant ils dis dal firà d'Ascensiu. Tut en tut è ella vegnida clamada 180 giadas, quai ch'è 25% dapli, cumpareglia cun l'onn avant, sco che la Rega ha communitgà. La bell'aura haja carmalà la glieud giadora. Sper salvaments ed evacuaziuns en muntogna è la guardia aviatica surtut stada en acziun pervi da pazientas e pazients cun malsognas acutas sco problems cardiovasculars. (cdm/rtr/fmr)



La Rega ha gi da far blier ils dis sur Ascensiu e sur la fin d'emna. Ella è sgulada 180 giadas.

FOTO REGA

MESOCO

Brischament da vehichel sin la A13

Sonda saira vers las 21.45 ha in vehichel brischià sin l'autostrada A13 a Mesocco. Il tunnel dal San Bernardino ha stuì vegnir serrà per in'ura en omaduas direzioni. Quai ha communitgà la Polizia chantunala. Il manischnunz da l'auto cun rulotta aveva remartgà ina sminuziun da la tracziun, uschia ch'el ha fermà tar ina guntgida d'urgenza ed ils passagiers èn sortids da l'auto. Quel ha lura cumenzà a fimar e brischar. Suenter emprovas da stizzar sez il fieud senza success han ils passagiers clamà ils pumpiers. Quels han lura stizzà il fieud. Il auto è tuttina brischià giu dal tuttafatg. Blessads n'hai dà nagins. (cdm/rtr/fmr)



Las restanzas da l'auto che ha brischià sonda passada sin la A13 sper Mesocco.

FOTO POLIZIA CHANTUNALA

In program per grond e pign

Igl Festivalet cumenza venderdi saira ils 21 da zercladur a las 19.00 cun in concert dals Incantanti, il chor giuvenil grischun. Vinavant vai cun Pascal Gamboni e sia Combo Crassira, Ladunna, e Mattiu cun ses giast Giganto. Era ina part putera na dastga betg mancar e quella vegn curt avant mesanotg cun Gianni Tschennett & Dolune. Venderdi e sonda vegnan musads tut il temp differents filmets. Sonda la damaun ha lura lieu la radunanza da delegadas e delegads da la Lia Rumantscha. Il suentermezdi datti alura insatge da far per las familias. Chant cun Ursina e las Chanterlotts, disegnar cun Cilgia Zangger



Dapli infurmaziuns chattais vos via quest code QR che maina sin la pagina d'internet.

